



**Broj: 01-170/22**  
**Vareš, 28.07. 2022. godine**

Na osnovu člana 22. i 95. Statuta Općine Vareš (prečišćeni tekst) broj:01-162/12 od 11.09.2012.godine, Općinsko vijeće Vareš na 18. sjednici, održanoj 28.07. 2022. godine, donosi:

**ODLUKU**  
**o izmjenama i dopunama Etičkog kodeksa vijećnika u Općinskom vijeću Vareš**

**Član 1.**  
**(Dopuna člana 2.)**

U Etičkom kodeksu vijećnika u Općinskom vijeću Vareš broj: 01-24/13 od 29.01. 2013. godine, u članu 2. iza riječi „Vareš“, dodaju se riječi: „da jačaju povjerenje građana i javnosti u integritet OV i izabranih zvaničnika,“.

**Član 2.**  
**(Dopuna člana 3.)**

U članu 3. iza riječi: „OV“ briše se tačka i dodaju riječi: „i podrazumjeva lica oba spola.“

**Član 3.**  
**(Izmjena i dopuna člana 6.)**

- (1) U članu 6. stav (1) dodaje se nova tačka b) koja glasi:  
„ b) nepristrasnosti/nediskriminacija“.
- (2) Dosadašnje tačke b), c), e), f), g), h) i), postaju tačke c), d), e), f), g), h), i) i j).“

**Član 4.**  
**(Novi član 7a.**  
**„Nepriistrasnost/Nediskriminacija“)**

Iza člana 7. dodaje se novi član 7a. koji glasi:

„Izabrani zvaničnik je dužan prilikom obavljanja svoje dužnosti i donošenja odluka u svom radu biti nepristrasan, bez ispoljavanja bilo kakvog oblika predrasuda, diskriminacije i favorizma (u odnosu na rasu, vjeru, pol, nacionalnu pripadnost, starosnu dob, bračni status, seksualnu orijentaciju, socijalno-imovinski status i svaku drugu različitost), te posebno nepotizma i kronizma.“

**Član 5.**  
**(Dopuna člana 8.)**

U članu 8. iza riječi „grupa pojedinaca“ dodaju se riječi „ili političkih stranaka.“

**Član 6.**  
**(Izmjena i dopuna člana 12.)**

U članu 12. iza riječi „finansijska“ dodaju se riječi „i materijalna“ a iza riječi „njihovo“ dodaje se riječ „nezakonito.“

Iza stava (1) dodaje se novi stav (2) koji glasi:

„(2) Izabranom zvaničniku, kao i drugim licima povezanim na bilo koji način sa izabranim zvaničnikom, je zabranjeno da javne resurse, javna sredstva, kao i službene prostorije koriste za potrebe političkih stranaka, izborne kampanje i sl.“

**Član 7.**  
**(Dopuna člana 13.)**

U članu 13. iza riječi: „izraza“ dodaju se riječi: „i gestikulacija“.

**Član 8.**  
**(Izmjena i dopuna člana 15.)**

U članu 15. iza riječi „korupcija“ umjesto tačke stavlja se zarez i dodaju se riječi „kao i od zloupotrebe povjerene dužnosti u svrhu sticanja lične koristi i koristi bliskih srodnika i drugih povezanih lica sa izabranim zvaničnikom.“

**Član 9.**  
**(Izmjena i dopuna člana 16.)**

U članu 16. stav (3) u alineji 4 iza riječi „član“ briše se zarez i dodaju riječi „i aktivno učestvovati u njihovom radu,“.

U istoj alineji iza riječi „razloge“ briše se zarez i dodaju riječi „najkasnije dva sata prije zakazanog početka sjednice,“.

Na kraju alineje 11. umjesto tačke stavlja se zarez i dodaju nove alineje koje glase:

„ – tokom obavljanja povjerene dužnosti neće primiti ili zahtjevati bilo kakve finansijske ili druge koristi u vezi sa povjerenom dužnosti izabranog zvaničnika,

- tokom obavljanja povjerene dužnosti neće koristiti službena ovlaštenja i ugled izabranog zvaničnika za sticanje bilo koje vrste koristi,

- u svrhu donošenja odluka, odnosno kod glasanja-izjašnjavanja o istim, neće posebno zahtjevati ili primiti finansijsku ili drugu vrstu koristi, kao naknadu za donošenje takvih

odluka odnosno takvog glasanja-izjašnjavanja, a koja pogoduje interesima određenog lica, grupe ili organizacije,

- tokom obavljanja dužnosti izabranog zvaničnika, a i nakon prestanka mandata izabranog zvaničnika ne smije koristiti povlaštene informacije odnosno informacije do kojih je došao u svojstvu izabranog zvaničnika tokom obavljanja svoje dužnosti, a radi sticanja finansijske ili neke druge koristi za sebe ili druga lica,

- dužan je izbjegavati stvarni i potencijalni sukob interesa, kao i izuzeti se iz svih postupaka u kojima učestvuje u okviru obavljanja dužnosti izabranog zvaničnika, kao i postupaka odlučivanja odnosno izjašnjavanja u slučajevima postojanja sukoba interesa, koji su direktno i usko povezani sa njegovim privatnim interesom, a u slučaju dileme da li se u određenom konkretnom slučaju radi o sukobu interesa, zatražiti savjet od Komisije za zaštitu ljudskih prava i sloboda, predstavke, pritužbe, prijedloge i jednakopravnost spolova OV, te mišljenje od drugih nadležnih organa i tijela,

- prilikom obavljanja povjerene dužnosti dužan je pridržavati se propisa u vezi sa zabranom istovremenog obavljanja nespojivih funkcija, prevashodno odredbama propisanim u članu 1.8. Izbornog zakona Bosne i Hercegovine,

- tokom obavljanja povjerene dužnosti dužan je spriječiti korištenje službenih prostorija Općine za potrebe političkih stranaka, vođenje izborne kampanje i slično,

- dužan je odbiti primanje poklona u vezi sa obavljanjem povjerene dužnosti izabranog zvaničnika uključujući i primanje poklona od strane drugih lica u ime i korist izabranog zvaničnika, uz izuzetak protokolaranih poklona i poklona manje vrijednosti u skladu sa relevantnim propisima.“.

#### **Član 10. (Izmjena i dopuna člana 18.)**

(1) U članu 18. iza stava (1) dodaje se novi stav (2) koji glasi:

„ Izabrani zvaničnik je dužan da otvoreno, potpuno i odgovorno informiše javnost o radu OV i radnih tijela u kojima učestvuje, kao i o svom ličnom radu s ciljem proaktivnog djelovanja u pravcu unapređenja transparentnosti rada OV.“

U stavu (4) iza riječi: „svaku“ dodati riječi: „zakonitu i primjerenu“.

(2) Dosadašnji stavovi (2), (3) i (4), postaju stavovi (3), (4) i (5).

#### **Član 11. (Dopuna člana 20.)**

U članu 20. u stavu (2) iza riječi „sebi“ dodaju se riječi: „ili drugom licu povezanom na bilo koji način sa izabranim zvaničnikom“.

U istom članu u stavu (3) iza riječu „upravi“, umjesto tačke stavlja se zarez i dodaju riječi: „izbjegavajući svaki politički uticaj na njihov rad i primjenjujući korektan odnos prema istim bez bilo kakavog omalovažavanja njihovog rada, potcjenjivanja i vrijeđanja, te iznošenje neistinitih podataka o njima i njihovom radu, kako za vijećničkom govornicom, tako i putem raznih medija odnosno sredstava javnog informisanja i društvenih mreža.“

#### **Član 12. (Dopuna člana 22.)**

(1) U članu 22. iza stava (2) dodaju se novi stavovi (3), (4) i (5) koji glase:

„(3) Komisija na svojoj sjednici razmatra podnesene prijave o kršenju ovog Kodeksa, provodi postupak utvrđivanja postojanja povrede odredaba Kodeksa i odgovornosti, te predlaže i izriče propisane mjere.“

(4) Predsjednik Komisije zakazuje sjednicu Komisije i predlaže uvrštavanje na dnevni red sjednice prijave i druge akate koji se odnose na povredu ovog Kodeksa.

(5) Komisija je dužna voditi evidenciju o svim aktivnostima na provođenju ovog Kodeksa i najmanje jednom godišnje podnositi OV izvještaj o pitanjima provođenja Kodeksa.“

(2) Dosadašnji stav (3), postaje stav (6).

### **Član 13. (Izmjene i dopune člana 23.)**

U članu 23. mijenja se naziv člana koji glasi:

**„Član 23.**

**(Podnošenje prijave i pokretanje postupka)“**

U članu 23. dodaje se novi stav (1) koji glasi:

„(1) Postupak zbog povrede Kodeksa pokreće se prijavom, koja mora sadržavati ime i prezime podnosioca prijave, kontakt adresu, svojeručni potpis, kao i ime i prezime izabranog zvaničnika na kojeg se prijava odnosi, kao i dokaze kojima se dokazuje konkretno kršenje odredaba Kodeksa.“

Dosadašnji stav stav (1) postaje stav (2), u kojem iza riječi „ članovi radnih tijela OV“ dodaju riječi „zaposleni u Općini, pravna lica“.

Dosadašnji stav (2) postaje stav (3) i glasi:

„Prijave se podnose Komisiji putem pošte ili predajom na Protokol Općine Vareš u pismenom obliku i potpisane, sa dokazima koji potvrđuju oblik kršenja Kodeksa navedenog u prijavi u roku od 30 dana od dana učinjene povrede Kodeksa.“

Dosadašnji stavovi (3) i (4) postaju stavovi (4) i (5).

U stavu (4) iza riječi „mjeru“ dodaju se riječi „o čemu se pismeno obavještava podnosilac prijave“

Iza stava (5) dodaju se novi stav (6) koji glasi:

„Komisija će u skladu sa svojim nadležnostima za provođenje ovog Kodeksa, zaključkom regulisati određeno pitanje koje nikako ili nije precizno regulisano ovim Kodeksom.“

### **Član 14. (Novi član 23a. „Postupak i odlučivanje“)**

Iza člana 23. dodaje se novi član 23a. koji glasi:

### **Član 23a. („Postupak i odlučivanje“)**

„(1) Komisija je obavezna da na svojoj sjednici razmatra podnesenu prijavu u roku od 30 dana od dana podnošenja prijave.

(2) Komisija može prilikom razmatranja podnesene prijave na sjednicu pozvati izabranog zvaničnika protiv kojeg je podnesena prijava radi iznošenja svog viđenja navedenih činjenica i okolnosti u prijavi, kao i eventualne svjedoke, ako je to u interesu utvrđivanja činjeničnog stanja.

(3) Ukoliko Komisija utvrdi da nema osnova za daljnje postupanje obustavit će postupak i donijeti odluku kojom se prijava odbija kao neosnovana.

(4) Ako prijava bude podnesena neblagovremeno ili od strane neovlaštenog podnosioca Komisija će donijeti odluku kojom se prijava odbacuje kao neblagovremena, ili što je podnesena od strane neovlaštenog podnosioca.

(5) U slučaju da nakon podnošenja prijave o povredi Kodeksa bude pokrenut postupak o istoj stvari prema propisima koji se odnose na sprječavanje sukoba interesa i borbu protiv korupcije ili bude pokrenut krivični postupak, obustavlja se postupak pred Komisijom.

(6) Ukoliko komisija u toku postupka utvrdi postojanje činjenica koje ukazuju na postojanje osnova sumnje da se radi o koruptivnom krivičnom djelu ili o kršenju propisa kojima je regulisano pitanje sukoba interesa, dužna je da o tome dostavi informaciju nadležnom organu.

**Član 15.**  
**(Novi član 23b.**  
**„Zastarjelost“)**

Iza člana 23a. dodaje se novi član 23b. koji glasi:

**„Član 23b.**  
**(Zastarjelost“)**

„Pokretanje postupka zbog povrede ovog Kodeksa zastarjeva u roku od šest mjeseci od dana kada je povreda učinjena.“

**Član 16.**  
**(Dopuna člana 25.)**

U članu 25. – dio Lakše povrede Kodeksa su, iza alineje 1. dodaje se nova alineja koja glasi:

- „ponašanje prema zaposlenim u Općini koje je suprotno sa odredbom člana 20. ovog Kodeksa.“

**Član 17.**  
**(Dopuna člana 29.)**

U članu 29. stav (1) iza riječi „Kodeksa“ umjesto tačke stavlja se zarez i dodaju riječi „na osnovu godišnjeg izvještaja kojeg predhodno sačinjava Komisija.“

**Član 18.**  
**(Utvrđivanje prečišćenog teksta)**

Ovlašćuje se Komisija za statutarna pitanja i propise da utvrdi prečišćeni tekst Etičkog kodeksa vijećnika u Općinskom vijeću Vareš.

**Član 19.**  
**(Stupanje na snagu)**

Ova odluka stupa na snagu danom donošenja.

**PREDSJEDAVAJUĆA**  
**OPĆINSKOG VIJEĆA**

**Mahira Brkić**

## **O B R A Z L O Ź E N J E**

### **I – PRAVNI OSNOV**

Pravni osnov za donošenje Odluke o izmjenama i dopunama Etičkog kodeksa vijećnika u Općinskom vijeću Vareš sadržan je u članu 22. stav 27. Statuta Općine Vareš (prečišćeni tekst) broj:01-162/12 od 11.09.2012.godine.

### **II – RAZLOZI ZA DONOŠENJE**

Unaprijeđenje rješenja propisnih važećim Etičkim kodeksom vijećnika u Općinskom vijeću Vareš, te usklađivanje sa preporukama i zaključcima proisteklim sa radionica koje je organizovala Misija OSCE-a u BiH sa sastanaka predsjedavajućih i sekretara općinskih i gradskih vijeća u Zeničko-dobojskom kantonu, koje su se odnosile na preporuke za pokretanje procesa revizije i aktuelizacije etičkih kodeksa za izabrane predstavnike u svjetlu prevencije i borbe protiv korupcije, revidiranja i preciznijeg definiranja etičkih principa i pravila ponašanja.

### **III – FINANSIJSKA SREDSTVA**

Za provođenje ove Odluke nisu potrebna finansijska sredstva.

**OVLAŠTENI PREDLAGAČ**

**Komisija za statutarna  
pitanja i propise**